

天岳山館文鈔

天岳山館文鈔卷八

多忠勇公別傳

多隆阿公字禮堂蒙古正白旗人隸黑龍江部世居齊齊哈爾城咸豐二年粵賊自江寧分黨北犯蒙古科爾沁王僧格林沁公統義師入衛詔徵黑龍江騎兵助剿公以參領帥二起馬隊入關隨征高唐州連鎮及馮官屯各賊巢平之五年奉檄援湖北隸江寧將軍都興阿公麾下六月從克武昌漢陽加副都統銜補協領充行營翼長進剿廬州敗賊於曹家河復黃梅廣濟進次孔壠驛賊來犯廣濟公敗之當是時李忠武續賓帥湘軍圍攻九江悍酋林紹璋死守不下復於對岸小池口築僞城號新城縣環以堅壘

七年正月賊夜築土城於魏家園公曰舍此不擊賊將益據要害急擊之夷其城於是附近之桂家畝賊壘及土城悉破未幾賊復於段窯築壘以通饒道公破之尋會各軍攻拔小池口時三月九日也皖賊悉銳上犯都公命公分駐濯港扼賊衝別遣鮑總兵趙帥選字五營駐意生寺備策應賊於楚皖交界之楓樹坳陶家嶺獨山鎮一帶各築堅壘自固公揚言先取獨山鎮而暗襲楓樹坳拔之後二日復揚言先取二郎河而同軍擣獨山鎮又拔之賊自是見公旗幟輒喪膽矣僞英王陳玉成驍勇健戰眾稱四眼狗者是也率悍黨踞黃梅縣境之傳前驛號四十萬連營百餘里四月都公督兵進剿戰於渡河橋平賊壘二十有一賊黨移小併大謀堅

守以抗我軍。五月，賊於大河埔迤北依山增壘，遂攻黃梅縣城。公與鮑公赴援，連戰兩日，賊始敗。會捻酋李兆壽率黨六千人來援，增壘於馬尾山、錢家灣等處，尋犯廣濟，窺武穴。公約鮑軍夜劫賊營，陰伏兵要隘待之。昏黑中，賊不辨眾寡，大敗潰。伏兵乘之，遂拔數壘。然來者愈眾，以數路牽制我軍。餘上竄蘄州，更分黨橫截童司牌、黃蠟山，以出我軍之後。勢張甚，會湘軍自九江來援，公會戰大破之。夷賊壘百餘，追奔至宿松城下，克黃梅。於是楚境報二次肅清矣。八月，賊棄宿松，遯。公師馬步軍壁城外，令鮑軍戍二郎河，以防回竄。九月，賊陷太湖，繇潛山、石碑、黃泥港三路來犯。分黨踞涼亭河。公與鮑軍約先剿涼亭，遲明大戰。自辰至午，踏毀涼亭河。

諸壘而悍酋僞陳天福等率四五萬眾仍踞石碑且結十三壘於楓香驛以犯二郎河之軍十一月公進次二十五里墩約鮑軍進攻賊殊死鬪公輕騎帥勁卒馳出賊後賊驚潰而潛匿民舍諸賊皆起賊見外援眾益憑壘堅守公督軍屢擊移時火其柵破十三壘擒斬四千有奇敗賊回竄太湖罷戰已二鼓矣八年正月僞地官燕等率黨七八萬繇渡船口等處上犯連營三十餘里將以綴我師而緩潯城之攻也公察其未成列急擊敗之擒其酋及四月朔而九江復矣八月公與鮑軍進攻太湖先破城外四堅壘賊棄城走潛山公遂與鮑軍進次石碑以規安慶石碑者地衝要與安慶爲輔車者也賊據山阻水用重兵築壘堅守之輔以礮船八月

公進攻上石牌。鮑軍攻下石牌。縱火焚木城。破卡十盡。平其堅壘。而東岸賊壘四。初猶死拒。我軍奪賊礮船。渡河進擊。皆大潰。計斃賊六千有奇。其逃入安慶城者。僅悍酋數十騎而已。自石牌破。安慶勢益孤。公逼城而軍。賊預從北門外築九壘。引湖水灌濠。以自蔽。九月。公與鮑軍合攻。斬首數千級。城賊出援。又大敗。反奔入城。城酋急撤閘板。不得入。殲焉。於是九壘悉破。急移軍壁其間。城賊數出犯。皆敗卻之。又敗其掠食之眾。十月。賊將突圍。遯爲官軍所遏。勢窮矣。亡何。湘軍敗於三河。舒桐潛太皆失。陳玉成率悍黨七八萬回援安慶。全局皆爲之動。公不得已。自焚其壘。督騎兵殿後。命步軍徐退。賊數來犯。數敗之。行抵宿松。決計守縣城。次日。賊大

至天霧咫尺不辨人馬公分五道迎擊三路策應令民團列高阜按劍觀戰俟我軍勝凡賊中輜重任恣取之比戰公親帥鐵騎陷陣敢死士隨之刃旣接斫賊如瓜擲首陣外諸將夾攻呼聲震天賊稍卻民團立山椒觀者皆大呼曰賊敗矣遂驚潰自相蹂踐死者萬計鮑軍射陳玉成中肩賊引去是役值三河新敗後人心離邊得此捷實東南大轉機也於是楚督鄂撫交章薦公可大用然賊雖受重創猶不時來犯也乃命鮑軍戍二郛河而自當荊橋一路賊以全力犯鮑軍公濟師援之大破賊於黃泥港逐北二十餘里賊始不敢闕鄂疆然玉成仍糾黨三萬餘踞宿松所屬之花涼亭阻險結營一十餘壁十一月公出不意大破之赭其營玉成精

銳十亡七八。乃痛哭潰竄。公遂偕鮑軍進規太湖。屯王家畝。一日賊犯寔營甚急。來請援。公誠勿輕動。而張樂寰諸將酣呼達旦。賊偵知其無備。遽舍寔營。乘夜來襲。公預伏兵要隘。賊至大敗之。其出奇不測多類此。是年冬。都公奉命督師揚州。疏舉公自代。遂以皖事屬公矣。當是時。曾文正公方以侍郎持節督水陸軍東規江寧。而尤以取安慶拔太湖爲先務。九年正月。太湖賊屢出犯。皆擊敗之。遂移營逼城下。諸將謀稍遠避鋒。公曰。不入虎穴焉得虎子。敢言退者斬。賊憑城出鬪。師小卻。公力戰挫之。壘卽日成。賊亦增陣濬隍。決上流引水入濠以相抗。二月。胡文忠檄督糧道唐訓方帥所部來會攻。援賊分三路大至。距太湖數十里。而石牌復爲



賊踞且築僞城。公先破蠟樹柯茶婆嶺賊巢。自三月至四月兩次攻城弗能下。八月公以石牌與潛望宿太毘連。必先取石牌而後太湖可下。乃選精銳自茶婆嶺進兵。用火攻困之。正慶關間援賊一自潛山來。一自安慶來。公派馬隊分途擊卻之。遂再克石牌。令提督雷正綰駐之時太湖久不下。廷旨趣進兵。胡文忠檄候補道蔣凝學來濟師。時公已補授福州副都統。各軍在太湖者悉歸公節制。十二月陳玉成勾合捻酋龔瞎子張藩刑悉黨十餘萬三路援太湖。公令鮑軍壁潛山小池驛。以當前敵。移蔣營駐龍家涼亭。而自帥馬隊駐新倉。賊犯寔軍。公親帥馬步進戰。鮑軍夾擊之。追至地靈港。破東岸十一壘。參領西林佈力戰死之。其西岸賊壘

六爲參領喀爾庫等所破。喀爾庫追賊中礮死。我軍殲賊數千計。雖有傷亡。猛氣愈厲。而陳玉成恃其人眾兇狡。亦自若也。於是胡文忠檄趙克彰、朱希廣二營移駐太湖東門。以防賊。賊玉成忌。遷左營之扼其衝也。築礮臺圍轟之。子若飛、蝗穿營幄如敝綢。士卒循牆蛇伏。樵汲不通。穴地以襲。鮑公請他營來代。公命雷正綰、楊朝林等各分軍半代。成其壘。移霆左於霆中營。俾暫休養。更以王可陞一營繼其後。復派死士百人夜襲礮臺。掩殺守礮賊。又以蔣鮑兩軍相距遠。急抽營結壘以彌其隙。十年正月。令唐營移駐蔣鮑兩軍之間。又以一營駐霆左旁。俾霆左仍駐原壘。會胡文忠已派候補道金國琛帥六千人冒雪自潛山之天堂進兵。與諸軍夾

擊二十六日公親帥馬步隊分五路進擣適東南風緊火其柵館  
延燒七八里破賊壘百餘殪賊七八千生擒三百餘名敗賊復爲  
桃花埔伏騎所截殺直追至潛山城下明日乘勝克潛山捷聞  
詔賞公頭品頂戴潛太克後賊黨回竄桐城時湘軍攻安慶已合  
圍七月公由挂車河進兵駐桐城之西北是夕賊來刼營爲伏兵  
所敗公察城中守備嚴惟西北隅求雨嶺有橫嶺一綫高三丈許  
曲懸如弓山前有小岡號毛狗洞賊築石砦其間護以木城復於  
城外築磚壘水堡環之公僞作攻城狀別遣勁卒自山後屏風嶺  
直擣求雨嶺之背昏夜築礮臺三比曉臺成賊驚以爲神乃大治  
攻具分二十道進攻毀其木城水堡賊三次出撲並經擊退遂奪

毛狗洞石砦全城在目。中矣。尋掘隧道轟城。不就。十月。玉成勾擒  
酋翼瞎子孫葵心等。悍黨十萬。自舒城廬江。援桐城。冀解安慶之  
圍。以逆眷在圍城中也。公迎擊於挂車河。敗之。賊於望鶴墩等處  
增築營壘。公分三路進攻。又大敗之。賊仍嬰城抗拒。時安徽按察  
使李續宜駐軍青草塢。公函約夾攻。自帥馬步各軍分路進。所嚮  
披靡。李軍亦破棠梨山賊巢。與公軍合。正酣戰間。各路兵馳至。遂  
毀賊壘四十有奇。賊館百餘處。殪賊八九千。墮水死者又數千。生  
擒千三百有奇。解散萬有數千。陳逆敗竄廬江。而桐賊遂閉城堅  
伏矣。詔賞穿黃馬褂。是年冬。玉成仍勾合偽玠王洪仁玠偽璋  
王林紹璋等。眾號十萬。旁繞英霍。圖上犯楚。曷以牽掣圍皖之師。

公力扼其衝賊不敢逞十一年三月公進屯高河埔扼水而軍紹  
璋等來犯大敗之賊爭赴水死河水爲之不流遂分兵合攻安慶  
尋破賊於新安渡斬首二千級是日部將穆圖善亦敗賊於挂車  
河四月敗陳玉成於磨山又敗之於鮑家橋玉成復糾髮捻三萬  
眾分犯青草壩高河埔挂車河公先發制之以馬隊二支步隊一  
支爲伏兵又分步軍爲六隊戰於江家橋賊殊死力拒我伏騎衝  
入賊陣各營乘之賊大潰後路火起伏騎已焚項家河賊館賊眾  
益亂玉成奔竄桐城遂焚江家橋麻子嶺及黃家埔諸賊巢蓋玉  
成挾全力圖解皖圍微公五戰勝之安慶之圍弛矣胡文忠疏稱  
公謀勇兼全忠勤倍至雖古名將無以過之因奉幫辦軍務之

命六月賊乘秋穫大舉來刈稻公敗卻之七月玉成率巨股一繇英霍上趨太湖一繇潛山下踞高樓嶺等處連營數十里公命佯敗以誘之詐稱病甚不能督軍賊至偃旗息鼓閉關不出賊大訾如弗聞也者如是數日夕賊終疑之尋獲我間諜謂公實病林紹璋大喜以告玉成遂以十一夜來犯公預伏二十餘營於左右路賊至夾擊皆棄械奔桐城以追兵急不能入城爭竄蔣家山遂燬其木城及賊館二百餘處次日敗賊竄廬江爲我伏騎所截殺斬首四百餘級天曉城賊出援又敗之遂將城外七壘踏燬是夕公登輓車遠眺曰賊眾十倍於我連戰皆敗今知吾所在夜必來劫營乃潛徙其軍賊夜至得空營大驚以爲神遂引去八月二日五

鼓遙望高河埔火光接天偵之則壘已空集賢關之賊爭竄石牌一路公曰安慶破矣蓋曾公國荃業於朔日拔安慶也公急召穆圖善密授機宜俾進攻桐城仍遣輕騎分截竄賊皆殲之而是日穆公及雷公正綰已乘勝攻克桐城越四日遂克宿松又三日克黃梅廣濟賊亦遁矣先是桐城旣克舒城賊膽寒公密諭穆公率捷師揚旗境上而於走廬州之路伏甲伺焉舒賊果棄城走廬州途次將蓐食伏發圍殲五百有奇於是舒城亦復捷聞 詔賞公雲騎尉世職十一月遷正紅旗蒙古都統又旬日擢荊州將軍蓋未一歲而已三遷矣時三河賊亦棄僞城遁公遂規取廬州同治元年正月公進兵廬州賊出數千人迎拒敗之遣騎軍斷其糧路

二月奪賊礮船二火大興集賊巢僞鑄天侯普祥甫等率賊千餘投誠散遣之尋破西門得勝門賊壘四會袁端敏甲三檄建甯鎮總兵張得勝帥五千人營於廬北之橫店公以玉成恃水爲險乃令掘隄決水賊數來撲皆敗之然濠長水深不能盡三月援賊大上乃停掘隄之役四月收賊於北門遂併力攻城破東門三壘玉成出援大敗不敢入城嚮板橋河一路竄去賊大亂各營肉薄登城乘風縱火遂拔廬州分兵追玉成玉成斷浮梁以數百騎奔壽州是役殪賊近萬生擒八百有奇斬僞官二百十有三解散七千餘眾時十五日未刻也陳玉成走投練總苗沛霖入壽州公令穆圖善雷正綰帥師追之距城四十里逼獻陳逆沛霖不得已擒玉



成解前督師勝保營誅之。公以玉成爲第一。兜渠今竭數年之力。得殲之。賊不足平矣。捷聞。詔加賞騎都尉世職。五月。擒匪自河南竄陝西。逼西安。官軍迎擊。失利。詔公馳赴陝省督辦軍務。公改轍而西。途中兩奉諭旨趣行。其時僞扶王陳德才勾合捻首姜汰陵、張落刑等二十餘萬。三路窺秦。公慮關隘爲其所奪。命先鋒雷正綰以陶茂林等三千人兼程前驅。令穆圖善等綴賊後。而自帥大軍繼之。七月。抵商南。陳德才已躡我軍之後。截我餉道。公與穆公回軍掩擊。大破賊於荆紫關。殲賊四千。蹈水死者亡算。遂復其城。賊宵遁。明日。公令馬隊追賊。步軍暫息。自以單騎入商南。而姜汰陵已率黨三萬驟至商南城。陋甚。賊繇富水關來。適當其

衝公飛調畱駐浙川之衛隊四營來商令官吏兵民男婦悉登陴  
協守洞開城門賊疑之終不敢逼迨夜來攻公已遣騎軍分伏城  
外爲疑兵而自帥衛隊開東門掩擊賊皆潰退詰旦公帥輕騎出  
城誘戰被賊圍抄公躍馬衝突立將部卒拔出賊不敢追是夕遙  
見火光燭天礮聲隱隱不絕偵之則部將朱希廣率四營自閒道  
來援夜半戰於穆家河距城十二里遲明再戰斃賊二千有奇以  
阻險回駐三角池公以賊眾且悍預調王萬年三營來援賊於二  
十九夜解圍西竄而公已預調陶茂林等設伏扼武關截其去路  
擒斬以千計又親督王萬年等躡擊之商境亂山叢雜兵勢難於  
展布公棄馬登山持令旗覘賊所向以旗指揮一敗之於石馬寨

再敗之於武關。於山口。於捉馬溝。又大敗之於大平山三角池。前後殄賊萬餘。姜酋僅以身免。張落刑亦聞風遁。是役以數千疲卒破五六萬悍賊。

天子壯之。賞黃馬褂一件。及江紉袍料荷囊。挾拾小刀諸珍品。而部將雷正紹亦遷固原提督。奉特旨幫辦軍務矣。會有詔命勝保督辦陝西軍務。移公赴南陽。力籌防剿。公敗陳得才於樊城。又敗諸唐縣鎮。遂屯軍樊鄧間。亡何勝保覆軍。回氛益熾。

詔授公欽差大臣。仍督辦陝西軍務。十一月。公入潼關。逆回圍同州。公擊其背。一戰大捷。解其圍。回酋倡亂。九閱月。受創自此始。遂扼賊於洛河之南。其地林木叢雜。袤斜百餘里。古稱沙苑。產蒺藜。

公部多南勇。跣足搏戰，苦不便。公多購草屨，令以布裹兩足，著之。兵威始壯。又以滾營法逼賊而壘。二年春，連破羌白鎮、王閣村、未華、喬店。孝義倉渡諸賊巢，馮翊悉平。初，公之破諸砦也，沙苑林中零星回巢，未嘗遣卒搜捕。諸將慮未盡絕，公笑曰：「君等尙謂賊未空出耶？我扼其吭，彼不合併，庸有生路乎？」不信。盡覘之，翌日往探，果如公言。五月，師次交河口。公適患暴下，憊不能督戰，迺擇諸將中持重者得穆圖善、陶茂林，令分軍跨渭爲營，以驍將朱希廣、趙旣發輔之。希廣與旣發素相善，欲併營於北岸，當賊衝。公慮以勇憤事弗應，二將請益力，公不得已乃許之。復戒曰：「君等當聽吾言，賊至堅壁勿戰。吾自有法破之，慎毋輕出也。」二將初尙耐守，後以

公病人賊日辱罵不能堪遂背令而出果中賊計遇伏戰歿公聞信力疾乘肩輿以後隊二千人往援大破之克交口十三村等巢翦滅殆盡尋又破南岸馬烏什東沙河諸賊砦餘逆三落不敢迎戰公慮其遁走遣卒招撫賊詭應之而陰以車馬運輜重西去公覺其詐密令曹克忠繞道截擊自率大軍進薄高陵無戰不克旬日間連克高陵涇陽縣城及塔兒寨永樂店咸陽之渭城灣蘇家溝馬家堡白起營各賊巢六十餘處縱橫二百餘里賊尸遍野馬不能行於是京兆亦定尋遣雷正綰援甘肅命陶茂林解鳳翔城圍進攻白吉原等處賊巢悉平之關輔肅清公欲度隴窮勦回匪先掃盪漢南川賊以清後路賊偵知之乃東遁而悍酋藍大順自

西蜀竄至陷盤屋公馳軍圍其城盤屋城小而堅藍酋又善守誘以計不出轟以地雷不墮公迺選各營健卒數百人力攻月城令將士曰賊雖善守月城破彼不能安處矣吾今分諸軍更番攻擊以逸制勞不出兩日賊必走西門近山必繇此出吾已預設伏兵藍酋可禽也迺親上礮臺擊鼓督軍力戰兩時之久悍賊死者十九公忽爲礮子中傷左目而鼓音猶不絕是夕賊果由西門遁伏起藍酋身中數槍逸至南山遂成禽餘賊悉滅公自提兵討賊身經三百餘戰克城砦二百有奇酷暑嚴寒未嘗安枕至是以創甚卒於盤屋大營同治三年四月十三日也年四十有七事聞

天子震悼卹贈太子太保賞一等輕車都尉世職入祀京都昭忠

祠其直隸山東山西河南安徽湖北江西陝甘等處立功省分均  
著建專祠賞銀千兩治喪 予諡忠勇公天性忠毅嘗誡其下曰  
我輩受 朝廷爵祿不能滅賊何以問心言次輒泣下泊軍嚴重  
用法尤峻每戰身先士卒不避鋒鏑兵勇被傷者力撫慰之至以  
已所乘騎載之歸所得廉俸悉以充犒賞官文恭知其貧郵寄三  
千金贍其家公知之馳卒追取悉爲戰士購征袍傷疾篤時昏迷  
中頻呼殺賊無一語及家事料敵如神尤知人善器使賞罰無所  
偏生平不識漢字遇公牘使人誦以聽爲指瑕而易之輒精當羣  
服爲天授云子雙全各世職併爲一等男

贊曰

國初以神武定天下東三省勁旅實爲根本所嚮輒有功近稍陵  
夷矣然得公及都公爲之將則旌旗爲之立變戰勝攻取若操券  
烏庫豈不以其人哉乃者鄰氛狡逞三韓頗多故矣語云聽鼓鼙  
則思將帥之臣安得起公於九京俾奏廓清摧陷之烈哉



童壯節彭勤勇二公別傳

童公諱添雲字鎮銘世居平江西鄉之板陂以貧故攜弟

長沙並入撫標充戰兵遂爲長沙人饒膂力能開五石弓射能命中道光二十二年西夷犯順公從提督果勇侯楊芳出師廣東一日夷撲城有營將在城外楊侯欲調之入火攻甚熾不能行令曰有能往者賞眾莫對公獨應曰某願往挺矛縋城出少選兵皆入城楊侯奇公賞六品服咸豐二年粵賊圍長沙公與弟必發從守城圍解公語人曰吾觀諸將中惟都司塔公及千總彭公膽勇過人將才也異日必能辦賊時忠武公塔齊布方以都司發湖南而彭勤勇公三元則以武科進士借補千總也會塔公鍊標兵公隸

其麾下別募寶勇五百人則以彭公將之公與彭公深相結期殺賊自効茶陵土寇作塔公帥所部進剿命公解火藥期三日至公踰宿卽至咤曰何速也公曰遲恐有阻隔則貽誤大矣四年三月賊陷湘潭塔公帥標兵及寶勇道州勇征之公與弟必發從時賊踞城外民屋塔公好輕騎嘗賊覘虛實公兄弟輒隨行一日塔公策馬率壯士數人入黃龍巷必發先驅巷狹而長甫入賊數十人突出攢矛刺塔公必發急以背受之中肩以巷狹故塔公得跳而免必發死之越二日師大捷湘潭平公擢守備或賀之公憤然曰賊戕吾弟吾雖官至一品弗願也但願生啖賊肉耳何賀爲遂繇湘潭轉戰至岳州公輒先陷陣斬馘亡算擢都司再戰復武昌

詔以游擊補用。賞換花翎。從克興國大治暨黃梅廣濟破賊於  
田家鎮。詔擢參將。公長身面赤色。額以下痘癍如錢目。炯炯若  
巖下電。每橫矛陷堅陣。礮彈雨下不稍卻。賊見其旗。輒相語曰。  
童子至矣。則皆走。十二月。塔公進攻九江。賊死拒不下。乃令諸將  
番休進攻。公帥隊薄城。礮彈穿其袍袴。千總某請收隊。公叱之曰。  
若怕死耶。何必從軍。益前進。忽賊礮傷公胸。昇歸營。創甚。塔公屢  
撫之泣。公曰。母然。但速攻城。越七日而卒。公善撫士卒。賞賜無所  
吝。身後發其篋。衣服外一無所有。同營皆哭失聲。詔贈副將。  
予諡壯節。賜葬祭。賞雲騎尉世職。附祀塔忠武專祠。而平江  
縣城忠義祠亦設主祀公。

彭公諱三元字春浦善化人。繇武生中鄉舉成進士。歸湖南撫標試用。期滿借補千總。咸豐二年賊犯長沙。前湖北巡撫羅公繞典奉命幫辦防務。檄公募勇丁助勦圍解。以守備卽補。賞藍翎。三年禮部侍郎曾公國藩奉命治團防。檄寶慶守魁聯募寶勇千人赴行省。而以公及寶慶協都司普承堯分將之。會江西泰和土寇竄茶陵安仁。公從塔齊布公往剿平之。擢都司。公所部遂隸塔公麾下。明年從破湘潭。賞換花翎。師抵巴陵。又破賊於新牆。於是寶勇以敢戰聞。八月官軍克武漢。公扼截洪山。斬馘多。晉游擊。會塔公與羅公澤南議分兩路進攻興國。大治等屬。以羅公湘軍過單。命公帥所部輔之。九月復興國。乘勝破半壁山賊巢。十月

四日官軍盡焚南岸賊營。明日賊連檣至。公扼諸江岸。會塔羅二公至。揮軍夾擊。追至下游。而上游賊數千舍舟登岸。將乘虛襲湘軍。老營公馳至。擊卻之。賊揚帆上駛。再登岸。公沿江追擊。會羅軍掩至。賊大敗。溺死亡。算論功。晉參將。十一月大軍渡江。攻黃梅。公陣橋西。扼賊衝。湘軍競進。賊卻。公遽踰橋。從柵門躍入。焚其營。遂復黃梅。移攻孔壠驛。入賊土城。擒僞丞相余福勝。遂同克廣濟。於是大軍復南渡。攻九江。賊堅守不下。塔公百計攻城。日與賊戰。相持幾一年。五月二日武昌復陷。八月塔忠武公卒於軍。曾公疏請以副將周鳳山接辦潯防。而以公及普承堯兩營副羅公同援武昌。九月復通城。進師崇陽。賊夜遁。會湖南防兵敗於蒲圻之羊樓。

崗退保岳州。羅公令諸營分扼羊樓崗。遏賊上犯。而獨與公及湘副中營李杏春駐崇陽。時僞總制楊萬年踞梯木山。分擾濠頭堡。堡人乞援。公與杏春帥所部進剿。入山焚其巢。將回軍。僞翼王石達開前隊突至。公迎擊。斬先鋒悍賊。而大隊厲至。賊鎗中公耳流血滿襟。戰益力。次日賊至益眾。公前逆戰。賊自後夾其營。公勒馬回救。殺賊渠一人。並格殺數賊。力竭墜馬。遂遇害。李君杏春亦死。之時九月二十五日也。羅公復戰而捷。卒克武昌。成大功。而公不及見矣。 詔贈公副將。 賜祭葬。 予諡勤勇。 賞世職。 祔祀塔公祠。 公忠勇識大體。 一子瑾光從軍。 濠頭堡之戰。 訛言瑾光陣亡。 左右以告。 公急止之曰。 速擊賊。 毋以吾子沮士氣。 督戰益急。 靖節

之日將出隊馬忽蹶醫三上三墜眾以爲不祥止之公不可易馬  
而出先是有旨命曾公舉堪勝總兵之員曾公以公及楊公載  
福應詔會公殉難不果擢瑾光以功保藍翎守備中武科舉人  
旋以疾卒於家

贊曰軍興已來知兵者首塔忠武公而爲之爪牙腹心者童彭二  
公其最也忠武資志沒兩公先後死綏皆不竟其勦天之厄之甚  
矣哉然自諸公倡勇敢雖婦孺曉然知賊之可滅其卒成大功皆  
諸公風聲所起抑皆其同袍澤者所爲也其與忠武公廟食千載  
宜矣

贈參將候補游擊黃君別傳

黃君國堯字聰軒乾州廳人居廳東喜鵲營汛城少沈毅有識略道光二十七年冬苗匪楊貴倡亂三廳戒嚴時汛城兵調出過半民情恟懼父老推君爲團長練鄉丁偕汛兵守禦君以兵法部署明賞罰嚴斥埃村民避亂爭攜家入汛城明年三月事定眾以君知兵勸入伍遂隸鎮溪營從征新甯李沅發以功賞六品服咸豐三年曾文正公治水軍於衡州調充水師營隊長從克湘潭復岳州賞戴藍翎尋克武漢敘把總田家鎮之捷以功晉千總亡何水師陷入鄱陽湖君從屯江西燔逆艘殆盡明年羅忠節公以湘軍克弋陽廣信君帥戰舟助勦遷守備六年副將周鳳山師潰於



臨江曾文正檄湖口諸軍回援於是南康爲賊踞六月水師復南  
康君擢都司詔換花翎君爲人寡言笑重氣誼以樸勇見知於  
統帥彭公玉麟會皖北賊氛熾當事疏稱無水師不能制賊命而  
水師莫善於湖南請敕湘軍選將領馳赴巢湖治戰艦創立水  
軍有詔趣行彭公問孰敢往眾遂巡莫對君請行遂以君應  
詔七年夏君率匠卒繞道蘇浙出東壩從蕪湖渡江間關抵廬州  
謁巡撫福濟慷慨陳時務福公以國士待之越五月舟師成名曰  
巢湖水師盡破潁湖賊壘淝水爲之一清以功晉游擊福公於旅  
見時嘗把臂語君曰壽春鎮一席微君將誰屬勉之蓋公擬聯師  
進規安慶且大用君也八年夏福公內召代者爲翁公同書時

大江以北遍地皆賊。廬州尤受敵。客兵約萬人。饜奇絀兵。屢鼓噪。結桀者。遂與賊通。當巡撫更代時。軍心益不固。君深以爲憂。屢言諸廬州守馬君新詒。相對歎息而已。七月十二日。馬守召君入城。計事。書日三至。或尼君行。君曰。公事曷敢避難。遂駕小舟。帥水勇十三人赴之。水寨距城八十里。詰旦入郡城。與馬守會議。殘茗尙溫。忽報賊入城。馬請與君暫避。入民舍。君不可。急上馬。帥從者出。當賊當是時。賊驟入。殺人如草。火四起。人馬騰蹕。聲如沸。哭聲震地。君大呼殺賊。手刃數人。賊初如入無人之境。至是突遇君奮呼巷戰。大驚疑。中伏。遂各披靡。使得壯士百餘人。繼之城可復也。柰諸軍無應者。賊環擊君。君願從卒。僅存徐福田。玉清兩人。知事不

可爲揮令逃生躍下馬手擒一巨酋口啗其面血如注曰吾且生  
陷汝賊黨叢刺之遂遇害年四十有三明日徐福歸水寨君從子  
兆槐密約水陸各營期復城亡何陸軍皆潰走賊塞淝水舟師困  
巢湖無出路又三日乃沈礮焚舟而散馬守出城後尋復官未十  
年至兩江總督君本無民社責又獨身計事非臨陣比使策馬潰  
圍出必可得生而君不願以彼易此也同治元年四月官軍克廬  
州彭公得君死事狀牒曾公具疏請卹得旨贈參將賞雲  
騎尉世職入祀湖口昭忠祠君仗策從軍時四子皆幼稚君訓之  
曰勉讀書善事祖母無他言在巢湖甚得民心秋毫無所擾數登  
岸微行與田更野老談穡事詢民疾苦困寢者輒周恤之又喜與

士大夫唱和。其和落日詩有句云：形雖入大地，光自射長天。時以爲詩識。而其英光不泯，抑可想見之焉。君三子補用直隸州知州長周有學行，從軍甘隴，具狀屬爲君傳，乃稍詮次其語如右。

贊曰：廬州，南北之樞也。古爲攻戰必爭地。自粵賊陷安慶，大吏奏移省會於廬。吾鄉江忠烈公以身殉城，越五年而君繼之。忠烈巡撫也，職當死。君則客軍耳，臨難獨不苟免。豈不誠烈丈夫哉！余嘗登湖口石鍾山，謁昭忠祠，拜君栗主。是夕泊舟山下，風大作，波濤怒號，作金戈鐵馬聲，猶想見氣吞凶逆之忠憤云。

李剛烈王武愍二公別傳

同治十年十一月二十二日有

旨下內閣故廣東從化縣知縣李福培揀發湖北知縣王恩綬於咸豐四五年間先後守城殉難業經奉

旨優卹並准建祠該故員等死事甚烈著加恩准其予諡尋得

旨福培予諡剛烈恩綬予諡武愍二公皆江蘇無錫人本中表戚同學相友善申以婚姻同以舉人充左翼宗學教習用知縣死事相距五閱月壽皆五十有二同膺 卹典 賜祭葬同 贈知府

銜同 賞雲騎尉世職及恩騎尉世襲罔替又同以言官疏請

敕建專祠事蹟同付史館列傳至是同荷易名之典其與李公同

殉者有弟議敘從九品性培及僕周鏞勇丁蘇兆英等九人與王公同殉者有仲子議敘從九品變及僕丁貴吳福壽二人皆附祀二公祠迹其生平出處大節無弗同者爰次其行實爲合傳

李公字仲謙一字心畬先世自松江遷無錫公事親孝母得風疾久臥不起公扶持抑搔無一昔違左右母卒將葬大雨雪以風公哀號徹旦天忽霽得葬如禮道光一年年甫冠入縣學卽以是年舉於鄉試春官十三次不第充教習期滿以知縣用歸主錦峯書院十年咸豐元年謁選知廣東從化縣地荒瘠頻年旱潦公至力請上官爲緩征明年充廣東鄉試同考官始公未蒞任時縣境有匪徒戕汎弁至是總督檄將弁來督剿獲匪百餘人寘諸法三年

夏賊嘯聚縣境烏石墟公督勇擊之躬冒矢石受三創力戰不爲止斬匪目呂亞林等百五十人餘黨潰四年春捕斬匪目謝亞青等五人而鄰縣賊黨起犯廣州擾佛山鎮從化介萬山中毘連七縣皆盜藪出沒無常公牒總督請撥兵二千分屯花縣之石角及縣境太平場爲會城屏蔽且斷賊糧不報乃自募壯丁數百人與典史趙應端及其從弟性培分將之七月賊數千突至公迎戰賊分黨入北門公潰圍出會縣人以鄉兵來援潰卒稍集公帥以戰賊敗走遂復城自是連戰凡七捷斬八百餘級賊將遁矣而奸人惑之賊黨益聚集勢以不支九月二十五日賊大至公急解縣印授其子鎮衡使齎送省會請援兵而誓以死守越一日賊用礮轟

城東門陷。公與趙典史及弟性培。馳登縣學尊經閣。北嚮拜曰。臣力竭矣。惟一死報國耳。賊相戒勿犯好官。冀脅公降。公嚼血大罵。築石以投賊。傷數人。賊怒。積薪燔閣。公與趙君及弟性培並死之。僕周鏞及練勇蘇兆英。曾念聖。關萬福。李聲著。李維諾。邱仰壽。龍用。張巨鵬等。皆從死。事聞。

賜卹如典例。尋許建專祠。又允科臣之請。得予諡。皆異數也。公就義處。有血影漬地。如人形。濯之愈顯。後任建石欄護之。榜曰忠蹟昭然。人以比侍中血云。公子四長。鎮衡。襲雲。騎尉。官知州。女子二。季女適同縣王庭楨。武愍公第三子也。

武愍公字樂山。一字佩綸。無錫王氏。其先來自金壇。公幼慧。未冠。



爲諸生廩於官肄業紫陽書院爲撫部林文忠則徐所賞識招入  
節署讀書稱爲篤實君子屢試不遇道光二十九年以恩貢生舉  
順天鄉試充宗學教習勤其職時惠邸奉命稽察宗學語人曰  
不視此職爲具文孜孜不倦者王教習一人耳咸豐初粵逆犯天  
津都城築嚴所親勸移寓外城公正色拒之年例滿引見以知  
縣用當是時湖北再陷再克復置吏以闕員請揀發選人視爲畏  
途多巧避或勸公勿謁選公曰時事多艱正人臣效忠之日何避  
爲肅衣冠而往遂入選有詔發湖北六年二月經南昌行抵長  
沙時賊從北岸上犯武漢岌岌或勸暫住公不可卅六日抵武昌  
城閉不得入時胡文忠林翼方爲布政使帥勇駐沌口留公於營

已命支行帳矣。公曰：爲楚吏義當入楚城，遂率仲子燮及僕丁貴、吳福壽縋而入。當是時，餉盡援絕，自巡撫以下皆束手待盡。屬吏爭借符檄出城，人無固志。公入謁巡撫陶文節，恩培及武昌守恭節公多山皆噴噴驚咤曰：「此旦夕死地，人患不得出，君獨患不得入，此何時乃有此義烈男子耶？」卽又好語慰遣之曰：「君無守土責，尙可出就胡營，畱此身以待用。」公涕泣持不可，乃奉檄登陴守禦。公與共事者五人約以死守。翼日城陷，有勸公去頂帽者，公叱之。聞陶文節殉節於黃鶴樓下，單騎走吳之賊。大至，公與多公手短兵巷戰，同時被害。仲子燮及丁吳二僕皆死之。明年冬，武昌克復，當事上公父子死事狀，疏稱其履險蹈危，毫無趨避，父忠子孝，足

振頽風請加等優卹得

旨贈銜 賜葬祭如例其後御史汪朝渠請於本籍建專祠疏稱  
公無守土之責視死如歸不特與草間偷活者判若天淵卽較之  
城亡與亡者亦分難易且忠孝一門僕從皆知赴義尤足扶植綱  
常巡撫郭柏蔭請於湖北建專祠疏稱公入城之日隔城陷止一  
夕其從容就義實爲蹈道不踰皆得

旨允行公好宋儒書尤好讀名臣傳曰吾他日當以此自律赴楚  
時與李剛烈公書曰大丈夫當此時勢與其老死牖下曷若埋骨  
沙場及聞剛烈公殉節深慙之因而躍躍欲仕逾數月抵武昌遂  
完大節蓋其素志定矣公七子變行二字理齋寄籍順天爲諸生

以謚錄議敘從九品卒年二十八卹贈主簿銜附祀公祠並祀昭忠祠賞雲騎尉世職次庭楨由副貢官江夏縣知縣擢候補道加三品銜襲雲騎尉

贊曰錫山爲理學節義之邦高忠憲顧端文之遺風遠矣李王二公生同里死同志較然不欺平生之言甚哉道相高兩人又以心相許也夫以百里之邑同時得兩忠臣又有孝子弟弟義僕爲之輔梁溪東林之正氣固日出而未有艾哉二公事在國史無藉私家紀述余爲合傳蓋動於懿好之不容已云

饒莊勇公別傳

饒公廷選字枚臣閩縣人少涉書史偶儻多大畧未冠入伍道光十一年張丙反臺灣以千總隨將軍瑚松額東渡提督馬濟勝號知兵嘉公材致之麾下獲賊多賞戴藍翎十四年遷守備十五年嘉義沈知等煽亂總督鍾祥以公習臺事檄之往事平賞換花翎歷權各營游擊所至兵樂而民安之總督吳文節文鎔以曉暢軍事疏薦二十一年七月海上事起公統精兵七百馳扼海澄二十四年三月總督劉韻珂檄赴馬巷擒匪徒陳鈕等是時水師提督寶振彪治水軍有聲公以陸路營將隨之出洋首先擊賊船擒其魁寶公壯之二十五年擢都司二十八年擢漳州左營游擊

咸豐二年調署中營游擊漳俗勁悍一言不相下則聚族而鬩訟之官必互誣其鄉之最富者爲首官提兵下則焚村以示威必各飽所欲而後息良懦者苦之而文武兵役及其鄉之莠民則無所不利公嚴戢所部親入鄉召父老反覆曉以利害使縛獻眞犯置諸法株連者湔雪之守令感公誠無異議故漳民之戴公也如慈父母焉三年三月詔安械鬪官治之不服勢張甚總兵曹三祝以公及龍溪令趙印川得兵民心使往是時潮州小刀會轉相誘結浸淫漳境窺公之出也潛伏城市中四月初十日倉卒起鎮道皆遇害所部卒郭連城護公眷屬出公聞變疾馳歸已而偵知會匪羽翼偏諸鄉良善者亦爲所脅乃獨攜健卒葉騰蛟等閒道趨郡

城半途賊圍而踪跡之有大姓某於眾中目公指謂羣賊曰此吾  
讐也無與諸君事吾將甘心焉遂翼公至其家再拜賀曰吾知公  
公再生吾等亦再生今郡城已陷公獨身歸死何益請爲公號召  
良民之脅從者脅從者聞公在必反正城中宜有應者賊不足平  
矣俄頃集千餘人公帥以行賊不敢逼始賊之陷漳城也與城中  
百姓約無相害百姓隱忍安之以待公至已而訛傳公及趙公爲  
賊所得驚走相告向賊索二公賊力白無之眾憤曰是必旣殺之  
而誑我也詎且鬪洶洶不可遏賊遂遁十七日公以鄉團至援賊  
復大集圍漳城數匝公嬰城固守時時出奇勝之大小數十戰賊  
乃潰總督王懿德檄公護漳州鎮總兵外剿內撫期年乃悉平四

年三月擢貴州安義鎮總兵旋護福建陸路提督五年三月粵逆陷廣信浙江危甚王懿德檄公馳阨衢州適甯紹台道羅忠節澤南以楚軍復廣信賊知三衢之有備也從徽州遁浙境以安六年逆酋楊輔清圖踞廣信以窺江浙率數萬人繇吉安出永豐倍道行陷廣昌南豐新城瀘溪等縣疾若風雨無敢當之者當是時江西學政廉兆綸督廣饒防務委樂平紳士石景芬統三營駐貴溪聞瀘溪陷景芬提左右二營迎之於金溪賊緣山出耳口寨八月初四日襲貴溪中營郭守謙以數百人誓死血戰沒景芬回援初五日潰於弋陽時廣信守兵數百聞風皆潰署知府沈文肅葆楨從廉兆綸籌餉於河口初六日單騎歸城無居人懸重賞募士無



應者惟與虜配林夫人枯坐待盡而已公時在玉山得告急書慨然趨治裝曰賊得廣信則玉山不可守是無江浙也東南大局視此一舉願諸君努力眾曰唯然夫役盡逃礮械鉛藥居後則無以爲戰從水路又舟膠不能下初七日賊謀入廣信城漏二下舉火爲號連甕累棟光燭數十里達旦大雨如注火始滅初九日雨益甚山水驟發河流漲丈餘公額手慶曰天贊我也師遂下前隊頃刻達沙溪去郡城五十里初十日公至方入館忽城中鼎沸公躍馬出有負裝且呼且走過馬前者立斬之眾然後定城中惟倉有餘米油鹽薪蔬闕如也卒或至暮不得爲炊無譁者是日賊軍城西四十里之太平橋十一日厥明旦北山賊幟如林前者按隊後

者立營部伍整齊望而知爲劇賊始謀之入廣信以空城歸報賊喜不以爲慮故避雨於河口興安凡二日及逼城乃大驚以爲將軍從天下也盡殺前謀之言空城者而氣已沮矣公所部僅千餘人背城擊賊輒勝鄉民聞郡中有兵喜爭擔負冒險入犒軍十三日賊大至長圍合接濟斷巨礮環轟子下城中如雨隨營文員懼脅諸將請於公曰吾屬奉檄守浙境廣信存亡非吾事也今賊將以地道轟城兵少不能支城旦暮破將死之乎且使廣信幸存賊以全力東趨兩浙其解誰職其咎宜潛師夜出退保浙境遲則無及矣公部將守備畢定邦賴高翔怒曰君等怯何如勿來今我在城中賊不知我虛實以爲我能援廣信後路必有所恃彼舍廣

信趨浙江恐前後受敵必不敢出此若棄城遁我在虜目中一  
可數情見勢屈追殲立盡尙何浙境之可保耶明日當決一死戰  
諸君於城上觀我破賊十五日定邦高翔開城出大呼決戰自晨  
至日昃毀其長圍軍聲大振是夜守令欲求觴酒豆肉爲公慶中  
秋不可得並巡城燈燭無之時月明如晝星河斂耀倚堞望賊壘  
悄然無聲公命去刁斗與沈公淪茗清談飄飄然作廣寒宮闕之  
想不知身在孤城中也十六日我師壓賊營賊不敢出次日賊遁  
事聞賜號西林巴圖魯聞浙大吏素不嫌於廣饒督防者疊  
以嚴檄召公歸詎諄備至旁觀咸爲不平公晏然俟接防兵到乃  
行曰吾不得不爲國家疆土百姓性命屈也七年六月調補衢

嚴鎮總兵八月會同徽師復婺源八年逆酋石達開以撫建賊五十餘萬傾巢出公從玉山飭參將胡定國援廣豐而自統所部馳歸衢州公至而賊亦至賊乘驟雨盡毀護城營壁以地道撼城城圯者三卒以堅禦得完凡九十餘晝夜目不交睫浙江巡撫晏端書以公失所屬三縣又未能速解衢圍疏請奪職疏出而圍解江常開三邑亦次第復奉

旨開復原官旋授贛南鎮總兵會閩浙總督王懿德檄公赴汀州病甚未能進遽劾公奪職然

顯皇帝知公忠爲畱贛南鎮缺九年正月病痊剿平白沙溪口土匪奉

旨仍補贛南鎮兵部侍郎曾文正國藩奏調赴江代沈公操楨防  
廣信從民望也已而楊輔清踞景德鎮公統平江等營扼之於浮  
梁十年逆酋李秀成陷浙江公繇江援浙四月復淳安奉

旨節制在防各軍五月授浙江提督杭州復後賊又來攻會同將  
軍忠壯公瑞昌巡撫王壯愍有齡擊卻之並復餘杭十一年九月  
進剿諸暨王公以省城危急飛咨回援二十九日至杭州時郡邑  
皆淪於賊數百里內無援師鄉民相率入城填塞閭巷糧爲之竭  
公稽部僅漳勇數百並江右所接統楚軍二千餘則他帥就地收  
集金陵潰卒事急以付公者又皆飢不任戰困守七十餘日米粟  
盡宰牛馬牛馬盡掘草根剔樹皮公惟以忠義涕泣激厲之至飢

踏載途無叛者十一月二十八日城陷巷戰手刃數賊死之年五十有八公性不嗜殺有以威克厥愛親公者公曰有罪不敢赦至於非其力之所及故殺之以示威吾不忍也善知人如畢定邦賴高翔皆拔諸儕伍之中並以戰功顯既而畢賴改隸他軍不竟其用以殞而公亦有思用趙人之歎矣 贈太子少保 予諡莊勇 賜祭葬世襲如例入祀昭忠祠並於廣信府建立專祠以副將畢定邦游擊賴高翔附焉長子塋襲職次于新同治三年舉人三子霖幼四子鈐甫三歲殉公難於杭城

贊曰沈文肅之守廣信也城空援絕誓身殉而已得公投袂赴援江浙並受其福當是時公義聲震天下文肅亦用此發聞於時而

閩浙諸大吏爭贅訾公且下石焉烏虜獨何心哉余嘗晤公建昌握手談天下事甚快公殉浙難屢擬爲公傳不果得文肅所爲公狀急錄而存之而文肅亦不可作矣悲夫

陳壯節江壯節蕭壯節三公別傳

陳公明志字澹如武陵人少入伍充湖南提標戰兵拔外委道光二十二年出師廣東補把總湖北鍾人傑作亂奉檄征崇陽以功賞六品翎頂稍遷辰州營千總二十九年李沅發倡亂新寧公進剿有斬馘功擢桂陽營守備遂署常德協都司明年提督向忠武榮出師廣西以公爲營將時賊勢陸梁官軍當者輒靡楚兵至連日與賊戰皆捷而公尤驍勇嘗大呼躍馬陷堅陣手梟賊酋於馬上軍中壯之敘功賞換花翎咸豐元年春剿賊金田村大黃江公皆在事有功會感瘴癘得疾楚軍中病者三百有奇欽差大臣李文恭星沅檄公領病軍回營休養病痊公赴桂陽任三年



向公充 欽差大臣督辦江南軍務奏調公赴軍前領乾州鎮遠  
河溪三營兵與賊轉戰數月四年補永順協都司五年遷廣西提  
標游擊帥師剿蕪湖大捷擢廣東雷州營參將六年奉檄進剿丹  
陽破賊數十壘斬級數百以功晉副將會官軍進駐紫金山戰事  
方殷檄公同大營充總理營務處五月十七日賊大舉來犯公帥  
潮雷各營弁兵奮力迎戰殲賊無數血濡袍袴皆赤而賊來益眾  
公激厲士卒血戰三晝夜十九日力竭死之年三十有七事聞  
副將例從優 賜卹 勅祀昭忠祠 賞雲騎尉世職 予諡壯  
節

江公忠信字誠夫新寧人少跼弛不羈饒膽力咸豐二年族兄忠

烈公忠源帥楚勇赴廣西助剿。公年十六從行。以獷悍數犯軍令。忠烈將斬以殉。眾爲乞免。及遇賊。驍捷敢戰。常爲軍鋒。攻永安州。時楚勇壁城南。賊悉銳來撲。公斬數級以獻。敘外委。嗣隨忠烈援長沙。戰湖北。解江西省城圍。皆在事有功。洊擢千總。及忠烈巡撫安徽。公乞假歸。亡何忠烈被圍廬州。其弟忠潛及同知劉長佑募壯士赴援。公躍然曰。此吾立功之會也。遂充哨官。比至。壁平西門外五里墩。時廬城中兵單餉絀。賊圍之數日。聲息不通。公夜帥壯士十數人。懷白鏃。油燭潛越賊營。縋而入。告以援至。因雷營中。賊屢用地雷轟城。城崩數丈。公率眾力禦。斬悍賊數人。城復完。又數帥壯士下城攻賊壘。斬馘多。忠烈壯之。奏以守備用。賞孔雀翎。

亡何城陷忠烈死難揮公使速去公不忍忠烈趣之曰若歸爲我復仇公跳而免時楚勇屯得勝門外七里站賊營羅列我軍與賊相持五年春諸將議逼賊而營公首撓其鋒晝夜合諸營力戰遂破賊營八擒斬三千有奇敘功晉都司及廬州復再晉游擊賜號毅勇巴圖魯會江忠潛假歸以所部屬公公遂爲楚勇統領六年五月提督和春帥師克三河鎮公與提督熊天喜攻南路破賊營二以功擢參將及克巢縣遷副將亡何總兵秦定三攻桐城久不下公奉檄帥所部往援時道梗不能通聲息公以計馳抵定三營中定議出奇兵夾擊遂破賊營十有六進逼桐城十六日賊大舉出犯公帥眾迎擊賊敗退追至東門外賊踰濠堅拒公持矛躍

馬越重濠而進。手殪悍賊數人。賊壘礮雨下。中公左腋死之。詔  
賜卹。賜葬祭。祀江忠烈專祠。予謚壯節。  
蕭公翰慶字黼臣。清泉人。咸豐元年。從都司徐大醇剿賊廣西。大  
醇死。綏公冒險扶其櫬歸。三年。曾文正治水師於衡州。公投効軍  
中。以戰功洊保千總。四年。夏。進攻岳州。賊遁。手紅旗報捷。文正奇  
其文雅。詢知爲讀書士。改敘從九品。從克武昌。擢府經歷。再擢州  
判。六年。改隸彭公玉麟部下。充水師營官。同攻武漢。晉同知。直隸  
州。冬十月。武昌克。復晉知府。七年。從彭公帥水師自外江會攻湖  
口。將戰。公察山後炊煙起。知有伏。乃潛從山後進。擣一鼓殲之。遂  
拔湖口。詔賞孔雀翎。八年四月。官軍克九江。公與副將孫昌凱

等登岸截擊北城逃賊無一漏網者敘功加道銜九年正月僞翼王石達開自江西南安竄湖南道郴桂圍永州長沙戒嚴鄂撫胡文忠檄公帥礮船援湘四月朔抵祁陽時沿江皆賊壘公躬入小河乘舳板督戰平之總兵周寬世及賊戰於長葉領公帥礮船夾擊之賊大敗湖南肅清乃回鄂詔以道員交軍機處記名簡放十年春江寧賊犯杭州浙撫羅公遵殿疏調楚軍援浙公與羅公子忠祐有舊遂請行倉猝無見兵得唐君訓方舊部號訓字營者四千人益以池州降卒二千馳赴之抵徽州而杭城已陷時左副都御史張公芾方治徽寧防務疏留公辦賊尋攻石埭太平克之詔加鹽運使銜方進攻池州而常州趨援甚急乃分降卒圍

池躬帥訓字六營暨親兵二營赴之途次聞湖州被圍乃改援湖  
時前路賊騎充斥眾請緩行公曰湖州皖浙咽喉也儻有失則兩  
浙糜爛矣行抵禮義橋悍賊突出公截橋而戰勝之日暮大雨軍  
士竟夕持仗立風雨中平旦啟行距湖郡四十里甫半而賊復大  
至我軍且戰且進抵同心橋賊來愈眾圍公數重參將吳修攷鄧  
茂先戰死公血戰良久力竭死之年三十有四事聞 詔加等賜  
卹 予謚壯節原籍及死事地方並建專祠

贊曰軍興已來楚之南荷易名之典者百餘人而陳江蕭三公並  
得謚壯節外此則江公忠濟童公添雲金公國太也諸公文武殊  
途事蹟亦各別而其無忝於令名則豈有異耶謚法猛厲無前曰

壯好廉自克曰節烏庠諸公得此其皆無憾於九泉也夫

呂孝子傳

呂孝子敦字信臣湖南永定人父孟卿家貧以訓蒙自給咸豐二年父遊學未歸母張氏病垂危思肉食不可得敦字年七歲出而貸諸屠屠不可泣而歸聞母呻吟聲益不知所爲計忽念有股肉可割以啗母乃取菜刀礪之手搗右股肉割四寸許無血以布裹其創令五歲妹就爐火炙之以進母母啖而甘之病霍然起踰旬父歸詢病狀喜其勿藥愈相慶更生然察敦字足微跛詰之詭以瘡對勘其瘡則退而卻走追褫其褰則刀痕長四寸有奇方虹潰痂未落也父大驚知爲刲股噉然哭母聞亦大哭敦字曰母然兒固無所苦且不痛楚也於是鄉人皆嗟異監生羅祥雲諗於眾



日七歲兒能是是不可不聞於官時合肥李公瀚章方權永定縣招數孚赴治所驗之賚以金帛牒大府請旌會粵寇犯長沙事上不果行同治三年學使呂公朝瑞取數孚入縣學旣而知其事亦賚金帛且旌以聯有此後臨深履薄勉作完人之句當是時李公已巡撫湖南與學使會疏請旌詔曰可岳常禮道何公玉棻作童孝傳以章之數孚尋食廩餼九年學使溫公忠翰疏舉優行請以訓導特用詔許之異數也未幾授華容學訓導勤其職居數年以外艱歸母氏今健在年六十餘

論曰割股例不著旌典思戕生以近名或流爲詭激也呂孝子刲股時方七歲彼知有母而已豈有他哉宜朝廷破格旌之

且擢居學職以風世也。二十年前余卽耳孝子名今及見之詢前  
事則泣然曰某不足道某父孟卿公嘗因母病刲股及父病革口  
閉矣乃羹股肉挾齒以進之病立起活十有六年壽至八十二乃  
終烏虜豈偶然哉然孝子當七歲救母時固不知厥考有是事也